

四庫全書

集部

欽定四庫全書

御定歷代賦彙卷九十三

音樂

長樂鐘賦

唐鄭錫

漢宮昏曉兮樓殿相望雙闕雲聳兮千門日長銅壺夜
漏金鏡朝光鏘華鐘兮肅天居之岑寂張猛簾兮壯神
客之焜煌含虛守靜應用無方聞之者朝警而夕惕扣
之者神和而意揚此乃樂府之彝器宮懸之高張豈比

夫羽籥絲竹匏土革木徒攢雜以鏗鏘若乃九陌初昏
重門聚櫺清禁將開繁星乍落月宿翠樓風棲金閣發
清音之響亮覺層樓之寥廓思遠客於鵲衣怨美人於
羅幕足使懷愁者感之而增歎得志者聽之而愈樂豈
在物之有心伊人情之所託及夫雞人未唱鵲鑰猶封
星翻南陸月卦西峯出入萬室周流九重走輕車於金
馬震櫺楹於銅龍千官警兮清珮響百鳥鳴兮春露濃
豈謝泗濱之浮磬豐嶺之霜鐘而已哉夫其逐吹含空

馳煙驛霧徘徊宮闕演漾官署虎嘯空中龍吟何處近
從丹庭之室遠盡青門之樹刺之以劒思利器之一揮
擊之以筵歎清音之難遇豈獨稱鳧氏於周典發鯨魚
以漢賦爾其春容鼓怒之音千石萬鈞之實洪爐鎔冶
之姿白蟲篆文之資總衆美以混成亮吹萬而得一客
有羈旅靈臺經過年首玄文未獻白賁徒久聲聞於外
空美鐘鼓未宮氣或在天誰知藏劒於斗懷洪音而未
發敢虛心而待扣

霜鐘賦有序

唐喬潭

南陽有豐山山有鐘霜降相鳴斯感氣而應也潭忝預
少宗伯達奚公特達之遇擢秀才甲科庶幾人間有是
譽處然南陽則公隱居之舊也故為霜鐘賦以廣知音
詞曰

豐山之峯巉巖積翠之石森爽凌寒之松上無鳥飛下
無人蹤深杳杳以靜謐有天然之古鐘兩樂神資九乳
靈化寧失制於侈弇豈遺音於窈窕每簾器以自閑常

宿懸而不下動於耳而藏於心必高秋之良夜於是沈
寥今日暮而天晶蕭瑟兮霜落而風清爽氣無朕前來
滿盈跳然出復鏗爾有聲信不擊而不考能大鳴而小
鳴始則含胡擁鬱旋復充訕紆間若往若還徘徊其間
爾其舒肆奔放長齊遠暢乍浮空以紆餘更觸物而瀏
亮入林蕭蕭在水湯湯泛濫淺瀨聯繚踈篁夜鶴怨兮
彌若寒猿悲兮更長餘韻春容隨風悠揚遠於洞庭浮
於瀟湘梧楸紛以離披兼葭颯其蒼蒼及夫夜已艾兮

彌靜山無人兮月冷初肅肅而自淒復礧礧而虛警其
動愈出其來甚徐合於元化遊於太虛轉遠而盡誰知
所如聊獨立以傾聽恍若失其躊躇聽不及已想存其
餘方其寒氣曉集鏘然應急發樾林密周流井邑前聲
未盡後韻相及羈臣之空館屢來思婦之高樓偏入莫
不恍然驚夢歔歔掩泣夫鐘之應霜也應以無心士之
知已也貴其知音不鼓而鳴者其聲遠不言而信者其
分深故自然之聲無假於煩手特達之分不資於騰口

吾欲徵華鐘喻良友懷音淵默藏器虛受可以適南陽
待清霜之一扣亂曰風籟起兮喧長薄霜鐘鳴兮動哀
整合大塊兮聲如作雖有聞兮常寂寞

夜聞山寺鐘賦

時宿高山
少林寺

唐
李子卿

寒月山空蕭蕭遠風有客靜聽雙林之中驚嶺深兮夜
分後龍宮隱兮洪鐘扣蒲牢關兮獅子吼魍魎懾兮魑
魅走搏泉頂兮墮谷口入有間兮出無有其發地也衆
竅怒兮羣籟起既襲山兮復噓水石鼓震於四荒雲雷

飛於百里其在空也漫兮浩浩殷兮雄雄若陽臺之散
雨似溟海之生風其稍絕也小不窺兮細不緊斷還連
兮遠而近著迴風而欲散值輕吹而更引寂兮寥兮忽
不知其所盡或有宴坐真境觀空禪林將泯萬法是資
一音惟其來無所見其跡察其去不可得而尋繁焉則
應應而無心葉繭曾是而聞縛驚猿因斯而受擒別有
道冀隱淪學傳文固鏗爾而作賈勇在於橫撞洞然而
來含毫思於一扣嶺上幢幢星漢移松楓颯颯風

原本
闕二

字
吾欲不書山鐘之狀何歌於斯詠於斯

觀鑄鐘賦

唐
瞿楚賢

陰陽作炭兮天地為爐陶甄庶類兮品物昭蘇上法下
象兮智者紀圖終宵盡日兮工人製模圖之如何情專
思苦模之如何聚沙凝土金堅以為樣度窈窕而成規
矩設機關立扉戶憑虛無以蹙凝疑索籥之有主尊鳧
氏之宏規鑄龍宮之信鼓青蓮妙果兮蒼生所怙檀施
如山兮縱觀如堵回祿用事兮烈氣激揚飛廉呈巧兮

熾聲赫怒沸沸渭渭奪於日光霍燬磷亂青熒蒼黃玄
穹之星夜落焉可侔象赤城之霞朝起無以比方疑崑
崙之飛爍吸晴天之太陽聚徒侶走匠石煎金膏煉鉛
液青白之氣畜精粗之氣適伶人奏樂以先譟法侶焚
香而接跡願觀者攢眸以奔騰畏歛者連袂以辟易開
竇泉注歸模電射固倏空而成功乃跼蹐而方闕攢插
開長繩曳衆力拔羣扛制歸禪關之清淨亂埃窗之煙
塵禮含稟說之文旋起熊龍之勢懸于簾鼓于宮氣凌

厲聲冲冲清塵濁警昏蒙惟良匠之鎔鑄尚其如此況
鴻鈞之陶冶行乎至公

洪鐘賦

唐
謝良輔

昔者皇帝度六律和五音率伶倫之士總金石之鈞將
合樂以教令俾洪鐘以平心當其形器作坯工進太房
既列風索伊震奉明謀以立象宛擻不慤出良冶而成
聲函圜得雋空以受氣動以發生尚羽大擊逢霜小鳴
穢浮為之疎曠沉伏由其震驚如戰韻以待扣每登懸

而惡盈若乃長鯨似小猛簾為狨崇巒呦糾練響潛越
九乳形矣信垂範於九州兩樂存焉更分儀於日月虛
而不屈應而無窮廣樂之器為音之雄欲其能鳴幸春
容以大扣冀乎聞外必鉤厲之有中不誇乎窮髮之墟
實美乎亭臺之宮儻擊考之無厭敢昭宣於國風

鼓鐘于宮賦

以喻以鼓鐘自
中形外為韻

唐李程

徵鼓鐘於前聞誠修身之善喻始自中出終能外布此
夫曠理必彰善惡之由將以審音不失洪纖之度擊之

于宮聲無不通乍超越以迴出竟周流而四充聞之者
足可以自誠聽之者於焉而發聰若然則處暗室者可
以慎獨在多言者曷若守中豈徒夾兩樂滿九乳運四
氣而應律合五音而中矩必將察理亂之變明是非之
至播洪音於萬鈞在敏手而一鼓由審音以聽焉鐘之
為喻警夫行道之人聲也何從出乎有過之地苟由中
而既發諒聞外之難祕夫鐘之所響響而見聽人之所
慎慎於未形雖扣之而在寢必聞之而盈庭禮失所譏

想杜蕢之揚解教之以義嘉大禹之勤銘和順積中鏗
訇發外可以掩笙鏞之逸響節干羽之繁會究彼所從
爰自九重鏘然有聲初疑乎叔之離磬鏗以立號如辨
乎僦之和鐘其小也究而無減其大也擲而不容原乎
其異察乎所以若禮之失惟鐘是比苟因聲而必聞信
無良而可恥故能分清濁韻宮徵將有感於動心寧取
樂於盈耳故君子之聽鐘非其鏗鏘而已

簾賦

漢賈誼

考太平以深志象巨獸之屈奇妙雕文以刻鏤舒循尾
之采垂舉其鋸牙以左右相指戴高角之峨峨負大鐘
而欲飛美哉爛兮亦天地之大式

六街鼓賦

以動心駭耳防
非之道為韻

唐王履真

惟道路兮此有其紀綱在昏曉兮用警於行藏設彼鼓
節以為人防俾守度而知禁咸順時而嚮方觀其四門
洞達九達攸長不有司局則政或以荒不有式遏則人
或以敷粵惟聖唐作法茲始岐路分職里閭對峙萬井

如棊三條若砥樹鼉鼓也罔不式遵命虎賁焉各慎所
履日入於酉俾於行者止斗回於天警夫居者起惟其
度數自合銅龍之漏節其晝夜不失金烏之晷豈比夫
繁於手盈於耳而悅彼姝者子平每司辰而不憊必候
時而後動聲坎坎而旁殷遐邇氣雄雄而中遏煩愒通
途廣陌萬戶千扉晨應雞鳴夕催人歸牛羊下時迎暮
煙而斯發河漢云沒伴曉色而漸微此乃守常有則守
矩不違一厥人兮人懷其信齊厥政兮政絕其非不然

者則是或見訛下無所稽使六厯時謬萬夫聽駭是知
街之設也所以通達幽深鼓之懸也所以發揚聲音豈
獨警其當路亦用革其非心職是司者爾罔不欽無先
天今以欲敗度無後天今則人匪忱別有養蒙以居惜
陰為寶遊藝鄒魯觀光咸鎬每聽嚶嚶之聲實樂平
平之道敢課虛而進牘聊體物而摘藻

敢諫鼓賦

以聖人來諫
諍之道為韻

白居易

大矣哉唐堯之為盛鼓者樂之器諫者君人命鼓因諫

設發為治世之音諫以鼓來懸作經邦之柄納其臣於
忠信致其君於明聖將俾乎內外必聞上下交征然後
為一人之慶蹟其旨知君上之無私酌其義知臣下之
勿欺獻納者於焉直節諷議者由是正辭故蹇蹇匪躬
道之行也蕭蕭不已聲以發之雖言之無罪而擊之有
時始也土鼓增革蕢桴改造外揚音以應物中含虛而
體道不窳不撝由工人之作為大鳴小鳴隨諫者之繫
考若乃宸居謚靜闔闔洞開隱隱聞於天闕瑟瑟發於

帝臺既類夫坎其缶宛丘之下亦象乎殷其雷南山之
隈音鏗鏘以鞀鞀響容與以徘徊倣於帝心四聰之耳
必達納諸人聽七諍之臣乃來故用之於朝朝無面從
之患行之於國國無居下之訕洋洋盈耳幽贊逆耳之
言坎坎動心明啓沃心之諫且夫鼓之為用也或備於
樂懸或施於戎政以諧八音節奏以明三軍號令未若
發揮謇諤啓迪諫諍聲聞於外以彰我主聖臣良道在
其中以表我上忠下敬稽前典敘彞倫諫鼓既陳諫聲

乃臻對善旌而俱懸義之與比將榜木而並出德必有鄰是以聞其音而知有獻替之士聆其響豈獨思將帥之臣嗟乎舍之則聲寢用之則氣振雖諫諍之在鼓終用舍而因人

諫鼓賦

唐王起

先王懼五諫之或替恐四聰之有蔽爰立鼓於朝得為邦之制臣之擊也將宣補袞之誠君之聽焉是叶從繩之契所以臨下國所以承上帝豈蓁蓁於金奏之間坎

坎於宮懸之際亦既戒止居然可分契無私之路彰不
諱之君猛簾趙趙以特立直言謇謇而必聞聽其音知
有譎而有諷察其狀亦非鼓而非鼓借如明明哲后輔
以賢佐懼德化之失慮政刑之墮必佇斯音用補其過
乃有閭閻之闕諤諤如林或匪躬自致或造膝來箴叶
帝閭而九重猶遠獻工藝而一人且深於是伐茲鼉鼓
殷爾雷聲氣作援枹雖假下臣之手聲聞豈續終沃大
君之心豈表識於作礪將思度於如金誰謂再而衰響

不可遏誰謂三而竭志由是達防口之政多慙遜耳之言載渴列彼天居大音所儲志惟勵乃仁則依於得夫賢掩善旌之所進箴於闕殊謗木之所書自得與一言而戾止何必諧八音而樂胥方今堯舜在上伊臯為政皇建極睿作聖而百官尚箴七臣猶諍用設之為舊典亦表之為新令念茲在茲是訓是彛藥石必納芻蕘不遺鼓亦高懸寧不考而不擊君惟無過願歌之而舞之

數里鼓賦

以聖人立制智
者妍精為韻

唐

柳宗元

異哉鼓之設也恢制度於天邑佐大禮於時行即行贊
盛容而立之斯立觀其象可以守威儀之三千節其音
可以表吉行之五十配和鑾以入用並司南而為急若
乃郊薦之儀既陳封禪之禮攸執經千里而分寸可候
度四方而禮容是集施五擊於華山之野知霧氣已籠
用百發乎南山之陽識雷聲所及先聖有作後王式遵
啓玄機以求舊運巧智而攸新相彼良工自殊味道之
士眷茲木偶應異迷途之人齊步武而無佚差遠近而

有倫遵大路罔僣乎禮典聽希聲克正於時巡雖道有
環迴地方險易固善應而莫實諒知幾而有為載考載
擊所辨於長亭短亭匪疾匪徐足分乎有智無智觀其
妙矣孰測其微細觀其微矣詎知其啓閉音不衰而得
度響其鏜而有制於以翊龍御於以引天旋異銅渾之
儀亦可敘紫微之星次殊玉漏之制而能步黃道之日
躔周物之智斯設極深之幾是妍鄙繁音之坎坎陋促
節之闐闐妙出人謀巧由神假時然後擊贊虞典於今

茲動惟其常契周文於古昔由是皇衢以正帝道斯盛
恭出震以成威膺御乾而啓聖我后得以昭文物展聲
明不愆於素可舉而行宜乎騁墨妙呈筆精固敢先三
雅而獻賦庶將開萬國之頌聲

刻桐為魚扣石鼓賦

以感通難測萬里相符為韻

唐闕名

物不可以智識念斯石之何為匪茲梧而不克況乎鼓
與魚兮非類吳與蜀兮異域何合應於自然杳勵響而

不測刃乃霜落鱗非錦攢擊蘊玉之形鏘鏘屢出裁嶧
陽之幹唯唯可觀叩寂寞而大音斯發中鏗訇而餘韻
不殫是知同聲者其和易殊器者其應難逢逢之韻且
千謹謹之音相萬不擊不考奚呈響亮之功大鳴小鳴
豈抱沉潛之怨運之靡終應而不窮覩之者謂聲存視
聽之表疑之者謂音在鬢鬣之中練響而洪纖皆答化
氣而遠近必通初密如於絲古倏坎然於暗空非誠貫
可覽將神交所感孤生之質徒效用於汕汕可轉之姿

終奮響於坎坎嗟乎石之為鼓也發於異鄉桐之為魚也來彼殊方何終歲之寂寂忽盈耳以洋洋自得於愜心應手豈待乎玉質金相棲鳳之稱既罷在藻之用何長扣之不止音亦無已詎徵冥應之言適諧響答之美相須以成事有類壘麓相應以成聲寧限道里則知審音斯發者不可誣懷聲思擊者不可孤諧千古之善應為二物之合符向不過張司空也知其蓄靈響而已夫

玉磬賦

唐
張仲素

客有觀光於樂府見玉磬之騰英嗟至寶之朋契如截肪之曲成挺十德以為美諧八音而作程韞櫝未施尚祕璘玢之色在懸以和乍聞清越之聲當其磬師來求玉人爰格將古樂之是備自他人而云獲追琢既成磨礲載白掩淒清之瓊珮洞閑華之水碧然後張之清廟奏彼朱宮懸篳篥而其容轉麗偶笙簧而其韻暫同明半規而似月發異彩而如虹懿此昭質暢矣音律練響而鳴球可諧還和而浮石非匹爛鮮華之溫潤含正聲之鎮密惠而好我

為齊路以足珍藏或俟時殊泗濱之自出至於擊拊孔
皆備虞韶而克諧清明可貴表尼父之忘味於以宣古
風於以蕩邪氣越羽籥之繁會聆鬼神於髣髴豈獨質
類冰凝響與風興混金石之華清光不昧較隍池之寶
美價斯騰是知叔之離而三代尚紀子之擊而千古攸
稱則知夫樂之所屬本於化俗方將審音以知政豈在
雕金而鏤玉麗矣哉荆山之珍兮可奏洞庭之曲

泗濱浮磬賦

以美石見質琢
之成器為韻

唐
闕名

水效珍今將應時而出珍浮水兮見可寶而逸當入用
之晨豈可藏於密所以次其崖岸露彼真質清明內融
符彩外溢霄舒夜渡遙分蟾兔之輝旭日朝臨下映蛟
人之室皆見其處幽邃誰見其內明媚皆知其隨波誰
知其抱器邦家藉之不我遐棄觀其璞將有營工其獻
情原本闕
二字規模可定剗割方成色光芒而白氣溫潤而
清是營是琢且見其能照載考載擊乃知其有聲夫如
是守靜而素豈不以有文而明因得之乎名曷觀之乎

器嘻同流不知誰念茲而在茲識者未覩寧寶之而存
之發跡徐方雖則泗濱而見呈祥聖代不同三獻之疑
况貞以自持涅而不緇堅以自祕毀而不變既成何用
之顧宜任當人之薦同百寶而敷陳雜衆類而朝見向
若不合宮徵之韻不叶雅音之績聞之者謂為空言見
之者謂為怪石則以日繫月徒滌盪於風波自秋徂冬
難覩覩於採撫焉可見哲匠顧盼良工追琢奏曲者想
乎簏簾審音者訓其清濁故知秉文者必有時藏器者

不終否理代之音既作移風之義斯起若不聞大韶大
濩庸詎知夫石之為美

泗濱浮磬賦

以水中見石可
以為磬為韻

唐闕名

禹別九州磬浮泗水為下不昧雖深可視或浮於淡其
滑如砥含餘音而未振漱迴流而增美日月其逝水石
相攻形潛水府律與天通值君子之深識調聖人之大
中備六音以繁會與四氣而玄同於以布聖理於以宣
王風配以閭闔之位應乎夷則之宮伊美石之潛處隔

清波而迭見儻混衆流不逢顧盼詎辭泗水之濱寧受
徐方之薦安可配黃鐘而備清縣乎洎大君之御寓乃
乘時而光宅作樂以應天象邦之成績設業設簋擊石
拊石德音橫於覆載至理彰乎損益烏獸以之率舞祖
考於焉來格固宗廟之登用豈泥沙之棄擲夫人之度
物物無不可制禮作樂實忘己以愛人漾川濟深亦披
沙而求我不以為碌碌不以為瑣瑣將使致中和非以
娛密坐迷堯心之克讓豈鄭聲之興禍當具人之未知

確乎安卑無小無大極幽而不隱不擊不考含和而莫
移動符於有德靜合於無為不然者何以別清濁於是
考存亡於斯降天神登地祇哉夫和之至者樂音之清
者磬天地之位辨君臣之分定苟失是邪以害直忠若
於佞故君子之所以理躬姦聲不留於聽

子擊磬賦

以敬明爾志人
將辨之為韻

唐呂牧

大哉將聖樂天知命憲章文武昭宣孝敬遊道藝之門
觀魯衛之政知禮文之述作繫王道之哀盛將有託於

知音故先擊其浮磬翕如始奏泠然激揚旁達草木獨
調宮商律中乃節而信清引而越以長何一氣之立則
若五色而成章羽可以振振獸可以蹌蹌神人以和舍
此奚取樂懸之位斯焉是將諧協於國風本一於心始
將此易俗非為悅已作於朝而君臣同和聽於家而少
長咸喜不違情者莫究其理不賞音者莫知其旨非有
為而作焉豈苟樂而為爾噫斯道之行如磬之聲合於
制度發以清英應小大以隨擊拊原始終不可將迎伊

物情之滯隔莫不由此而發明謂為藝以吾不試語之道而知吾志固非繫而不食豈止垂之如墜曾見訪於萇弘反受嗤於荷蕢彼往而不返欲潔其身如樂之無節則可奪倫義有味於反舌耳無間於日新何沒沒於隱者亦硜硜於小人必也審音居然大辨動應而溥暢虛中而獨善使石聲無定則我心可轉初未明乎弛張庸詎議乎深淺一雅一變正聲久遣子擊此者亦屢歎之唯聖有作闡教命變乃知樂正雅頌復在於明時

笙磬同音賦

以樂之和者異器同音為韻

唐 班 肅

清明廣大之謂樂度曲節奏由乎器既克諧於五聲諒
同歸乎一致汝陽之孤篠斯有泗濱之浮磬云備吹噓
爰發搏拊遙至等輔車之相依契歌詩之必類同夫影
響常動靜而俱隨象彼璫簾每應感而不匱聯絲並奏
聲音相和用不殊途方予唱而汝和動而相躡固無偏
而無陂列其容異薰蕕之共器會其理若涇渭之通波
載清載濁貫三才之合樂若浮若沉叶六律而揚音將

九成而備曲比二人之同心如言行之相顧成乎慥慥冠鐘鼓之迭奏樂彼欽欽雅韻復興時則若舞鸞鳳和聲互應斯乃如鼓瑟琴音之作也曲無誤者脩爾合度鏘爾中雅寧有顧於周郎自不惑於子野訢合皇王之化跡混同車書於天下遠而聞也謂羣鶴和鳴於碧空近而聽之如廣樂調韻於春風鏘鏘間發要妙無窮類金蘭之堅芳美而取婉配文質之彬郁和而且同何異夫相應在於同聲相資在於同志譬權衡之並用謂相

待而成等韋絃之自節則以同而異原夫律呂咸在吹
擊惟時異周旋而樂只可終始而從之兩器玄通鳴簧
與幽石相感二者冥合竹聲與石聲相追審至樂之盡
美伊斯器之可持

笙賦

晉王廙

其制器也則取不周之竹層城之苑生懸崖之絕嶺邈
隆峰以崇高延修頸以亢首厭瑤口之陸離舞靈蛟之
素鱗銜明珠於帶垂弱舌紙薄鉛錘內藏合松蠟以密

際糝彤丹以發光

笙賦

晉夏侯惇

嗟萬物之殊觀莫比美乎音聲總衆異以合體匪求一
以取成雖琴瑟之既麗猶靡尚於清笙爾乃採桐竹翦
朱密摘長松之流肥咸崑崙之所出抑揚噓吸或協或
吹擗拈挹按同覆互移初進飛龍重繼鷗雞振引合和
如會如離若夫纏絲約殺足使放達者循察通豫平曠
足使廉規者棄節冲靈冷澹足使貪榮者退讓開明爽

亮足使慢情者進竭豈衆樂之能倫邈竒特而殊絕

笙賦

晉潘岳

河汾之寶有曲沃之懸匏焉鄒魯之珍有汶陽之孤篠
焉若迺絲蔓紛敷之麗浸潤靈液之滋隅隈夷險之勢
禽鳥翔集之嬉固衆作者之所詳余可得而畧之也徒
觀其制器也則審洪纖面短長剡生竽裁熟簧設宮分
羽經徵列商泄之反謚厭焉迺揚管攢羅而表列音要
妙而含清各守一以司應統大魁以為笙基黃鍾以舉

韻望儀鳳以擢形寫皇翼以插羽摹鸞音以厲聲如鳥
斯企翾翾岐岐明珠在味若銜若垂修櫪內辟餘簫外
透駢田獵擺鯉鯨參差於是迺有始泰終約前榮後悴
激憤於今賤永懷乎故貴衆滿堂而飲酒獨向隅而掩
淚援鳴笙而將吹先嗚噓以理氣初雍容以安暇中佛
鬱以拂惛終鬼竅以蹇諤又颯還而繁沸罔浪益以惆
悵若欲絕而復肆慟傲糴以奔邀似將放而中匱愀愴
測減虺韡煜熠汎淫汜豔雪煜爰爰或案行夷靡或疎

勇剽急或既往不返或已出復入徘徊布護渙衍聳襲
舞既蹈而中輟節將撫而弗及樂聲發而盡室歡悲音
奏而列坐泣擗纖翮以震幽簧越上筦而通下管應吹
喻以往來隨抑揚以虛滿勃慷慨以慘亮顧躊躇以舒
緩輟張女之哀彈流廣陵之名散詠園桃之天天歌棗
下之纂纂歌曰棗下纂纂朱實離離宛其落矣化為枯
枝人生不能行樂死何以虛謚為爾迺引飛龍鳴鷗雞
雙鴻翔白鶴飛子喬輕舉明君懷歸荆王謂其長吟楚

妃歎而增悲夫其悽淚辛酸嚶嚶關關若離鴻之鳴子
也含糊啾啾諧雍雍喈喈若羣雛之從母也郁將劫悟泓
宏融齋哇咬嘲啗壹何察惠訣厲悄切又何磬折若夫
時陽初暖臨川送離酒酣徒擾樂闋日移疎客始闌主
人微疲弛絃韜籥徹璫屏篴爾乃促中筵攜友生解嚴
顏擢幽情披黃包以授甘傾縹瓷以酌醺光妓儼其偕
列雙鳳嘈以和鳴晉野棟而投琴况齊瑟與秦箏新聲
變曲奇韻橫逸縈纏歌鼓網羅鍾律爛熠爚以放艷鬱

蓬勃以氣出秋風詠於燕路天光重於朝日大不踰宮
細不過羽唱發章夏導揚韶武協和陳宋混一齊楚邇
不逼而遠無攜聲成文而節有敘彼政有失得而化以
醇薄樂所以移風於善亦所以易俗於惡故絲竹之器
未改而桑樸之流已作惟簧也能研羣聲之清性笙也
能總衆清之林衛無所措其邪鄭無所容其淫非天下
之和樂不易之德音其孰能與於此乎

笙賦

唐
李百藥

馮南郡天才豔發含章挺生既妍精於舊史亦流悅於
新聲佩銀章於東洛分竹使於南荆芬盛德於蘭茝獵
香風於杜衡縱調文於雅笛留神思於和笙客有寓於
郢都者聞結風之妙曲預高堂之歡宴拂長袖而善留
絕飛纓以增盼重鳳翼之次羽愛鸞音之清轉請體物
而味言寄風流於藻綯君曰懸匏出自西河奇籥生於
南國山川載挺之異班倬攄思之德固常人之所知無
假言於翰墨至於曲引繁會之美才人妖麗之則實有

動於余衷庶陳辭而祛惑覲傳芳於風雅將永代於刊
勒客曰唯唯惟八音之遞作總六律而相旋徐疾短長
之攸濟寒暑風雷之所宣清廟象功則韶武播於金石
良辰歡宴則鄭衛流於管絃豈無求於變俗將區分而
在焉於是玄英在呂青陽戒律雲捲蕙樓風生蘭室柳
佩翠而辭寒梅含香而受日始覺華樹鶯啼早不悟雕
梁燕來疾縱勝氣之逍遙眷春光而怡逸命郊驛以迎
賓爛華茵而促膝玉饌厲而不爽金罍湛而將溢佳麗

新妝徐步長廊風搖裙佩日照釵梁慣同瑤輦乍出閑
房時顧步而疑進或輕臨而欲翔耀千金之重價婉二
八而成行發繁絃於流徵動浮磬於清商舒披蓮於舞
席散垂藻於歌牀獨仙吹之容裔將凌雲而抑揚見秦
趙之音劣識巴渝之調下掩衆技而奪氣諒聲高而和
寡歌狂會於楚謠詠承筐於周雅既駭聽於吳札亦留
神於晉野婉婉鴻驚喈喈鳳鳴或萬殊而競響乍孤轉
而飛聲清則混之而不濁濁則澄之而不清實當無而

應有固虛受而徐盈舄奕多緒紛綸難管抑之則徘徊
繇密甲之則散朗寥亮始掩斂以夷靡終優游以怡悵
隨流睇而照愉應微頤而悽愴挫玉簫之清管息瓊篴
之虛唱落遺囀於梁間墜纖腰於掌上既而重門半掩
高宴將終飄餘音於霄漢過嬌韻於房櫳遠而聽之若
遊駕翔鶴嘹唳飛空近而察之譬瓊枝玉樹響亮從風
信絕俗之神解何變態之無窮爾乃綺帳垂妓行散巫
雲歛楚妃歎獨婉孌於瑤笙尚纏繚於皓腕蘇合薰兮

龍燭華連理解兮鴛枕粲既藉寵而橫陳恣深心之秘
翫懼管聲之易歇恐君愛之難終起長歌於清夜寄微
意於春風歌曰新聲雖自知舊寵會應移無令衆下吹
變作一枯枝重歌曰為想雍門歎當思執燭遊不惜妾
身難再得方期君壽度千秋

璵賦

唐
鄭希稷

至哉璵之自然以雅不僭居中不偏故質厚之德聖人
貴焉於是挫煩淫戒浮薄徵甄人之事業暴公之作在

鈞成性其由橐籥隨時自得於規矩任素靡勞於丹牖
乃知瓦合成亦天縱既數有以通無遂因無以有用廣
纔連寸長匪盈把虛中而厚外圓上而銳下器是自周
聲無傍假為形也則小取類也則大感和平之氣積滿
於中見理化之音激揚於外邇而不逼遠而不背觀其
正五聲調六律剛柔必中清濁靡失將金石以同功豈
笙竽而取匹及夫和樂既翕燕婉相親命矇瞍鳩樂人
應仲氏之麓自諧琴瑟雜伊耆之鼓無相奪倫嗟乎濮

上更奏桑間迭起大希之音見遺俚耳則知行於時入
於俗曾不如折揚之曲物不貴人不知豈大雅守道之
無為夫其高則不偶絕則不和是以桓子怠朝而文侯
恐卧豈虛然也為政者建宗立樂者存旨化人成俗何
莫由此知音必有孚以盈之是以不徒忘味而已

塤箎相須賦

以樂和同聲然
後致理為韻

唐

許堯佐

彼塤箎兮謂何同律呂兮相和苟論功於衆樂孰有德
而同科遂使手之足之候清音而屢舞伯氏仲氏諧雅

韻於升歌疾徐共節長短同旨感肅雍今一貫伺夏擊
分雙起為合雅而諧聲故殊音而共理然則大篴諧奏
美矣德音之音鳴璫獨聞同乎以水濟水是故變通可
象節奏斯呈爾韻方舒我則厲之以疾我音斯濁爾必
懲之或清苟同方而助化故異氣而成聲信可以發揮
韶夏協贊和平故得舞獸呈姿豈繫於附石嘉賓展禮
不讓於吹笙且璫資土以辨類篴假竹而成器土容質
可以符素心竹聲清可以滌煩志是則相從以和律相

因以成事苟洋洋而在聽諒醇醇而自致且彼鼓鐘于
宮未足論乎異同鳴琴自手且何議乎先後豈若宮商
並奏律呂相宣調五聲不資於繁細應八佾無違於折
旋樂則既爾臣亦宜然壘之得簾載期於有輔臣之奉
主必致乎無偏唱和之功備矣獻贊之道存焉故能振
三代之風合九成之樂彼衆器之雕飾此羣聲之煩數
又安足擬壘簾之純質論聲音之清濁

金罍賦

有序

梁簡文帝

舍弟西中郎致金鐃一枚周禮云鼓人掌六鼓四金以節聲樂以和軍旋以金鐃和鼓金鐃節鼓注曰鐃鐃于也圜如椎頭大上小下樂作鳴之與鼓相和淮南云兩軍相當鼓鐃相望若古之禮器飾軍和樂者矣吾竒而賦之其辭曰

有鐃于之麗器實軍樂之兼珍伊前古以為美成名都之匠人採赤鎔於蜀壘求銅精於灌濱若夫鼓以陽鑪營之陰炭是鐃是刻載輝載煥笑烏獲之奮槌踰嵇生

之善鍛實規形之可悅以妙聲之遠聞譬洪鐘之虎紐
學章鼎之龍文至於簋簠先列金石俱諧八能效技六
變程才觀雲龍之鬱郁望威鳳之徘徊沛縣留三日之
飲平樂有十千之杯揮秦箏之慷慨伐晉鼓之嘽嘽皆
能協宮和徵節往通來宣奏有序度曲可觀鄣金鋪之
非德啗商叢之易殫應南斗之鳴瑟雜西漢之金丸若
夫伏波出討貳師遠征蒲昌對戰孤竹臨兵映似月之
遙羽飛如鳧之去旌軍魚麗而齊上陣龍滕而俱行望

烏雲之臨敵聞條風之入營壯士被犀良馬絡鐵野曠
塵昏星流電掣日侵山而欲隱霧陵空而不滅望水色
其如花覩奔沙之似雪咸聽響而先登並聞鳴而為節
當此時也畫角恥吟胡笳不吹刁斗暫捐金鉦虛置何
資和之不營而吐聲之雄異制六師之進旅警三軍之
武志嗟吾弟之博物實愛奇之已深識且鑒於鳴石貺
有踰於兼金如陳器於栢寢似出鼎於汾陰豈寶玦之
為貴非瑚璉之可欽昔武都之一扇乃銘功以述心矧

元常之五熟又刻篆以書音况茲贈之為美而古跡之
可尋聊染翰而操筆終有愧於璆琳

匏賦


以五音克諧
次用為韻

李程

自然之器匏也可覩宜標名於曲沃竟入用於樂府將
以驗遺聲追淳古聽自分乎雅鄭事有動於三五俾夫
繼咸池而嗣六英越大章而誇大武觀其發徵含宮設
商分羽洎清角而雜奏合五色而相輔笙磬悒悒而在
聽鳥獸蹌蹌而率舞其為器也尚質其感人也則深類

韶樂之和自當忘味恥齊等之濫詎可同音伊昔哲匠
未顧伶官未臨分瓜瓞以為伍將葛藟而是尋空思諧
於音律寧望齊於瑟琴願以剗心去苦葉而展用寧無
滋蔓懼甘瓠之見侵今則規模有制清濁不感受天和
而乃圖其象生土德而再黃其色不患大而拙用奚能
繫而不食道無自滿我則虛受而持盈物有混成我則
不宰而為德是知察清音而匪匏孰可含雅韻而匪匏
不克矧國家大樂既備萬邦允懷惟異域欽和而內嚮

君子勤禮而外諧至哉聽斯匏之音也可以知太平之階



御定歷代賦彙卷九十三

欽定四庫全書

集部

御定歷代賦彙卷九十四

詳校官檢討_臣劉炳

主事銜_臣徐以坤覆勘

總校官編修_臣王燕緒

校對官中書_臣陸湘

謄錄監生_臣李炎

欽定四庫全書

御定歷代賦彙卷九十四

音樂

琴賦

漢
傅毅

歷嵩岑而將降觀鴻梧於幽阻高百仞而不枉對修條
以特處蹈通涯而遠遊圖茲梧之所宜蓋雅琴之麗樸
乃升伐其孫枝命離婁使布繩施公輸之剗剗遂雕琢
而成器揆神農之初制盡聲變之奧妙抒心志之鬱滯

琴賦

漢
蔡邕

爾乃言求茂木周流四垂觀彼椅桐層山之陂丹華煒
煒綠葉參差甘露潤其末涼風扇其枝鸞鳳翔其顛玄
鶴巢其岐考之詩人琴瑟是宜爰制雅器協之鍾律通
理治性恬淡清溢爾乃清聲發兮五音舉韻宮商兮動
角羽曲引興兮繁絃撫然後哀聲既發祕弄乃開左手
抑揚右手徘徊指掌反覆抑按藏摧於是繁絃既抑雅
韻乃揚仲尼思歸鹿鳴三章梁甫悲吟周公越裳青雀

西飛別鶴東翔飲馬長城楚曲明光楚姬遺歎雞鳴高
桑走獸率舞飛鳥下翔感激絃歌一低一昂

琴賦

有序

晉嵇康

余少好音聲長而翫之以為物有盛衰而此無變滋味
有厭而此不勸可以導養神氣宣和情志處窮獨而不
悶者莫近於音聲也是故復之而不足則吟詠以肆志
吟詠之不足則寄言以廣意然八音之器歌舞之象歷
世才士並為之賦頌其體制風流莫不相襲稱其材幹

則以危苦為上賦其聲音則以悲哀為主美其感化則以垂涕為貴麗則麗矣然未盡其理也推其所由似元不解聲音覽其旨趣亦未達禮樂之情也衆器之中琴德最優故綴歛所懷以為之賦其辭曰

惟椅梧之所生兮託峻嶽之崇岡披重壤以誕載兮參辰極而高驤含天地之醇和兮吸日月之休光鬱紛紜以獨茂兮飛英蕤於昊蒼夕納景於虞淵兮旦晞幹於九陽經千載以待價兮寂神時而永康且其山川形勢

則盤紆隱深崔嵬岑岳玄嶺巉巖岵岨峴崿崿崿
青壁萬尋若乃重巘增起偃蹇雲覆邈隆崇以極壯崛
巍巍而特秀蒸靈液以播雲據神淵而吐溜爾乃顛波
奔突狂赴爭流觸巖觝隈鬱怒彪休洶湧騰薄奮沫揚
濤澌汨澎湃蜚蜺螭相糾放肆大川濟乎中州安迴徐邁
寂爾長浮澹乎洋洋縈抱山丘詳觀其區土之所產毓
奧宇之所寶殖珍怪琅玕瑤瑾翕艷叢集累積奐衍於
其側若乃春蘭被其東沙棠殖其西湄子宅其陽玉醴

涌其前玄雲蔭其上翔鸞集其巔清露潤其膚惠風流
其間疎肅肅以靜謐密微微其清閒夫所以經營其左
右者固以自然神麗而足思願愛樂矣於是遐世之士
榮期綺季之疇迺相與登飛梁越幽壑援瓊枝陟峻嶒
以遊乎其下周旋永望邈若凌飛邪睨崑崙俯闕海湄
指蒼梧之迢遞臨迴江之威夷寤時俗之多累仰箕山
之餘輝羨斯嶽之弘敞心慷慨以忘歸情舒放而遠覽
接軒轅之遺音慕老童於騁隅欽泰容之高吟顧茲桐

而興慮思假物以託心迺斲孫枝準量所任至人攄思
制為雅琴迺使離子督墨匠石奮斤夔襄薦法班倕騁
神鍤會裒厠朗密調均華繪雕琢布藻垂文錯以犀象
藉以翠綠絃以園客之絲徽以鍾山之玉爰有龍鳳之
象古人之形伯牙揮手鍾期聽聲華容灼爍發采揚明
何其麗也伶倫比律田連操張進御君子新聲嫋亮何
其偉也及其初調則角羽俱起宮徵相證參發並趣上
下累應蹀躞踈砢美聲將興固以和昶而足耽矣爾乃

理正聲奏妙曲揚白雪發清角紛淋浪以流離奐淫行
而優渥粲奕奕而高逝馳岌岌以相屬沛騰遄而競趣
翕曄曄而繁縟狀若崇山又象流波浩兮湯湯鬱兮我
我怫惛煩冤紆餘婆娑陵縱播逸霍濩紛葩檢容授節
應變合度競名擅業安軌徐步洋洋習習聲烈遐布含
顯媚以送終飄餘響於泰素若乃高軒飛觀廣廈閒房
冬夜肅清朗月垂光新衣翠粲纓微流芳於是器冷絃
調心閒手敏觸挽如志惟意所擬初涉淥水中奏清徵

雅昶唐堯終詠微子寬明弘潤優游躊躇拊絃安歌新
聲代起歌曰凌扶搖兮憩瀛洲要列子兮為好仇餐沆
瀣兮帶朝霞眇翩翩兮薄天遊齊萬物兮超自得委性
命兮任去留激清響以赴會何絃歌之綢繆於是曲引
向闌衆音將歇改韻易調竒弄乃發揚和顏攘皓腕飛
纖指以馳騫紛愜喜以流漫或徘徊顧慕擁鬱抑按盤
桓毓養從容祕翫闔爾奮逸風駭雲亂牢落凌厲布護
半散豐融披離斐韡爛英聲發越采采粲粲或間聲

錯糅狀若詭赴雙美並進駢馳翼驅初若將乖後卒同
趣或曲而不屈或直而不倨或相凌而不亂或相離而
不殊時劫拊以慷慨或怨懣而躊躇忽飄飄以輕邁乍
留聯而扶踈或參譚繁促複疊攢仄從橫駱驛奔遁相
逼拊嗟累讚間不容息瓌豔奇偉殫不可識若迺閒舒
都雅洪纖有宜清和條昶案衍陸離穆溫柔以怡懌婉
順序而委蛇或乘險投會邀隙趣危嚶若離鵠鳴清池
翼若游鴻翔曾崖紛文斐尾絺繆離纚微風餘音靡靡

猗猗或樓挽櫟捋縹緲澈冽輕行浮彈明嫿際惠疾而不
速留而不滯翩緜飄邈微音迅逝遠而聽之若鸞鳳
和鳴戲雲中迫而察之若衆葩敷榮曜春風既豐贍以
多姿又善始而令終嗟姣妙以弘麗何變態之無窮若
夫三春之初麗服以時迺攜友生以遨以嬉涉蘭圃登
重基背長林翳華芝臨清流賦新詩嘉魚龍之逸豫樂
百卉之榮滋理重華之遺操慨遠慕而長思若迺華堂
曲宴密友近賓蘭肴兼御旨酒清醇進南荆發西秦紹

陵陽度巴人變用雜而並起疎衆聽而駭神料殊功而
比操豈笙簫之能倫若次其曲引所宜則廣陵止息東
武太山飛龍鹿鳴鶡雞游絃更唱迭奏聲若自然流楚
窈窕懲躁雪煩下逮謠俗蔡氏五曲王昭楚妃千里別
鶴猶有一切承間遶之亦有可觀者焉然非夫曠遠者
不能與之嬉遊非夫淵靜者不能與之閒止非放達者
不能與之無吝非至精者不能與之析理也若論其體
勢詳其風聲器和故響逸張急故聲清閒遶故音痺絃

長故微鳴性潔靜以端理含至德之和平誠可以感盪
心志而發洩幽情矣是故懷戚者聞之莫不憫懷慘悽
愀愴傷心含哀悞吟不能自禁其康樂者聞之則歆愉
歡釋抃舞踊溢留連瀾漫嗚噓終日若和平者聽之則
怡養悅念淑穆玄真恬虛樂古棄事遺身是以伯夷以
之廉顏回以之仁比干以之忠尾生以之信惠施以之
辯給萬石以之訥慎其餘觸類而長所致非一同歸殊
塗或文或質總中和以統物咸日用而不失其感人動

物蓋亦弘矣於時也金石寢聲匏竹屏氣王豹輟謳狄
牙喪味天吳踊躍於重淵王喬披雲而下墜舞鸞驚於
庭階游女飄焉而來萃感天地以致和況蛟行之衆類
嘉斯器之懿茂詠茲文以自慰永服御而不厭信古今
之所貴亂曰惜惜琴德不可測兮體清心遠邈難極兮
良質美手遇今世兮紛綸翕響冠衆藝兮識音者希孰
能珍兮能盡雅琴唯至人兮

古琴賦

宋 陳襄

客有孫枝之琴號曰太古之器樸兮不文淡焉無味痕
交錯而蠹生色爛斑而塵蔽疎絃危而不紊瑤軫岫而
幾廢吁至道之難行悵知音之未至淒淒然泠泠然故
獨以因時而遣意泊乎夕照西沉蒼梧半陰對明月之
千里上高臺之百尋爾乃豁妙慮開沖襟撫玉柱揚清
音不獨解吾人之愠將以平君子之心太丘子乃輾轉
不寐振衣而起悄焉凝懷寂焉傾耳意躑躅於幽蘭心
彷徨於流水由是納中和蠲侈靡審樸畧之遺韻達真

純之妙理忽然不覺至道之入神而大化之陶已別有
宛洛佳客金張貴侯塗歌兮邑詠朝歡兮夕遊設瓊漿
兮綺席張翠幙兮青樓莫不弄秦聲歌郢曲吹女媧之
笙簧播子文之絲竹然後酩酊乎醉鄉駢闐乎歸軸又
安能審雅操之微妙聽丹絃之斷續而已哉嗟乎大道
既傾澆風益行雖歌吹之沸天徒管絃之亂人方今朝
廷淑清天下化成願以古人之風變今人之情以今人
之樂復古人之聲則斯琴也可以易俗而移民而斯世

也可以背偽而歸真

琴賦

有序

元
楊維禎

天台蔡仲玉以琴訪予水南山北樓希音瑟然而無近
世新聲之變蓋蔡君力執古道而深造樂情者也於其
別也作琴賦以贈

伐孤桐兮龍門斬靈梓兮泗濱配美木兮陰陽繩朱絲
兮君臣準遺則兮泰皞比正律兮伶倫成綠綺之雅製
於以御夫至人蓋其理中和復清真宣八風明彝倫感

天地動鬼神桑濮不能間其邪而鄭衛不能入其淫者也夫自虞歌既杳襄教不宣東市絕調高山毀絃黃鍾擯棄正始沈馬蠅咬遷變下俚嗑焉歎人器兮俱喪孰能傳其不可傳吾子佩焦尾象前賢蹴子野排田連起千載而非後追太古而無前得非瘖萬雌而雄鳴藹凡翅而孤騫者耶爾其觚酒登爐熏熱僕清風介朗月拂素雲揮白雪朱絃既絲玉指作挽宮羽相宣角徵參發雅韻依永長歌赴節愉焉款款悽焉屑屑蕩焉裔裔苑

馬咽咽繹馬如縈攢馬如折汜馬如沸刺馬如竭煥若
春溫霽若甘霖繁若榮葩蕭若枯林高者拔馬而峻下
者濁馬而沉急者矢馬而激緩者紆馬而深央央坎坎
噦噦惜惜鏗鏗磕磕栗栗淋淋如冷泉激澗籟動谷鳴
如巫山夜雨隴水秦聲如村翁野老之嬉笑如鶯喉鵲
語之呶嚶如大風飄瓦而軒磕如胥濤鼓譟而澎湃至
若詳其曲引則優柔溫淳長養恢渾郁乎南風之薰也
融怡和順溥博沉濬洋乎流水之潤也愴悅坎壈怵惻

恒惜戚乎履霜之慘也憔悴虺虺徬徨低回摧乎別鶴
之哀也其憂也深其思也長其樂不淫其哀不傷滌煩
決塞導和養康懲躁寬鄙立懦摧剛可謂至德之精音
而三歎於一唱者矣已而中聲五降均曲成闕造弄向
闌敏手暫輟銀蟾在天星漢明滅主賓頽然仰視空濶
於是命酒起舞而為之歌曰萼芳洲兮芙蓉擎扁舟兮
葦叢渺極浦兮千里望遠岫兮橫空吾將與子泝洞庭
歷九峰登玉霄攀閬風招漁父之往櫂兮探湘靈之遺

踪訪遐奏於涓子兮引高吟於春容窺人寰而曾舉兮託
遺響於無窮舉天籟以成吾音兮寫余心之太沖又
何有於戲成兮三尺之桐

焦桐入聽賦

以泠然雅音至
聽方識為韻

唐王起

聽之微者不必五音伊焦桐之逸韻契伯喈之明心氣
逐炎炎始將隨於槁木聲飛烈烈終見用於雅琴當其
大匠未收樵人所利圭葉零落孫枝殘瘁以薪見迷以
竈求媚聲連而丹雘乍飛響送而紅星忽墜聞之者徒

為木之槁火之熾殊不知八音之珍佇五絃之至彼美
中郎神妙無方樂無不審音無不詳聽執爨之間克諧
律呂聞就燥之處乍合宮商乃言曰惜乎斯桐韻實天
假可以加雕斲可以暢韶雅何混彼樗林而棄於薪者
於是收質燄燄求音泠泠撲滅其色鱗皴其形被之以
絃佇水流而山立鼓之為操必鶴舞而魚聽則知桐之
成器待其人而克定桐之有聲非其人而靡聽向若清
耳不傳瓊材遂損希聲率爾聾俗猶然則半死之根誰

一收其餘燼孤生之幹將久滅於青煙祠之熱今人之
德焚身之原本闕一字今躬忽見屈殊不知焦尾為珍竟獲
伸於多識至矣哉感知音者願是傲而是則

無絃琴賦

以舜歌南風待絃後發為韻

唐張隨

陶先生解印彭澤抗跡廬阜不矯性於人代笑遺名於
身後適性者以琴怡神者以酒酒兮無量琴也無絃琴
星微於日下陳鳳啄於風前振素手以揮拍循良質而
周旋幽蘭無聲媚庭際之芬馥綠水不奏流含後之潺

爰以為心和即樂暢性靜則音全和由中出靜非外傳
若窮樂於求和即樂流而和喪扣音以徵靜則音溺而
靜捐是以撫空器而意得遺繁絃而道宣豈必誘玄鵠
以率舞驚赤龍而躍泉者哉如是載指載撫以逸以和
因向風以舒嘯聊據梧以安歌曰樂無聲兮情逾倍琴
無絃兮意彌在天地同和有真宰形聲何為迭相待客
有聞而駭之曰樂之優者惟琴君之聖者惟舜稽八音
而見重彈五絃以流韻故長養之風薰而敦和之德順

無為而天下自理垂拱而海外求覲伊德音之所感與
神化而相參固以極天而蟠地豈惟自北而徂南然則
琴備五音不可以闕絃為音而方用音待絃而後發苟
在意而遺聲則器空而樂歇先生特執由心之理而昧
感人之功俾清濁不聞於小大宮商莫辨夫始終攫之
深舍之愉促空軫而奚則角為民徵為事扣無聲而曷
通抵反古以自異實詭代而違同孰若同靜華以發外
合恬和而積中傳雅操於心手播德音乎絲桐俾其審

音者悟專一之節奏知變者美更張之道崇先生曰吾野人也所貴在晦而黜聰若夫廣樂以成教安敢與夔而同風

五色琴絃賦

以宮商角徵羽文武為韻

唐仲子陵

絃有五色而播蓋出乎舜官方理之而登於壽域故制此而歌夫薰風黑與青間青與赤通或以白而受采或以黃而居中本乎朱襄以至陶唐因加而自七至八以少乎惟宮與商事匪因於蠶餌或不由於蟹筐園客以

登夫鈎軫墨子徒歎於蒼黃及其瓠巴所彈師文所學
流連昭曠縹緲繚邈莫不因其靜好生比和樂張伯牙
之號鐘舍師曠之清角八音克諧兮自比五色相宣兮
有以雖因聲以至用終假色而為美清音從內而發和
氣由中而起奏激楚則引以結風歌陽春則雜以流徵
或向虛壑或臨積水影歷歷而分形聲泠泠而過耳直
其躬而能屈鮮其色而受汙惡以紫而奪朱常恐新而
代故大白若辱有以見至道之源小扣必鳴有以昭儒

者之度召姑洗則草木潛發歌黃鍾而川池異沍泉魚
澆潯以躍鱗雲鶴婆娑而拂羽至如心有所感聲成於
文既為事而為物亦有臣而有君哀而不慘樂而不分
著萬物之情性和二氣之絪縕別有鳴琴在筵實篚無
覩木繩則直色然後取儻同聲之不遥願聞乎亂之以
武

孔子彈文王操賦

以審音知人前
後一撥為韻

唐
薛勝之

文王有聲惟聖能審初彈雅操知德音而有懷稍奏遺

音覺儀形之可稟黹然之狀已究鏘然之響可尋述而
不作載好其音德必不孤諒前聖合於後聖道乃無二
誠此心達於彼心其神也邂逅相遇其慮也罔或不欽
則知掩四方而氣正加一絃而義深曲引烝哉調吟皇
矣穆穆乎順帝之則洋洋乎令聞不已同聲相應雖千
古而會徽音異日而論猶萬邦而聆遺美所以聖賢不
遠古今一揆且將合於心豈獨盈乎耳既而溫故知新
若聖與仁千里同風自冥契於風韻千年一聖當間出

於聖人玉指迴軫朱絃應律運八風而吹萬迭五音而
不一既而文德在茲以寧王道宥密斯操也必俟後賢
吾無間然陟降因我而著昭穆因我而宣符蓋徹之言
無毫釐乖於是叶同音之理豈合度差於前是謂惟神
所受繼聖之後自得於心匪傳於口稽帝謂之意勤止
豈無非天縱之才生知何有無音不合無德不宜翼翼
之心因心而會疊疊之善盡善而知師襄於是作而言
曰子聖人也與文王而同規

鍾期聽伯牙鼓琴賦

唐 林慮山人

天贊厥德惟伯牙與鍾期一則能清師曠之耳一則能
調園客之絲愜易象斷金之義應詩人伐木之詞審爾
律呂不爾瑕疵何千載之見遇使二妙以同時且琴者
所以納正禁邪弄者所以協情和性必藉其手敏亦假
其心靜使音無所容於姦聲安得惑於鄭若然者信可
謂能彈而復思乎善聽能彈翼若播於往古善聽伊何
奏難鹵莽所以協律之六應聲之五故將中感於天地

豈惟外合於匏土不爾何貴鍾期之聽何尚伯牙之鼓
緬想二子徽音不取冥合匪慙於郢匠絕藝方超於瓠
巴賴爾能聽知子有嘉苟解揮宮以按徵豈勞樹羽與
崇牙乃若被褐懷珠當年入賦合絲桐之響希爾促柱
有金石之音思君惠顧以聲韻當於清彈以詩書同乎
雅琴顧惟小人之迷得迴君子之心儻能順聽欲仰訴
於知音

鍾期聽琴賦

有序

唐
王太真

昔曾待詔金門屬吾君軌道久之事寢歸歟寧省竊服
古訓見郭林宗傳曰貞不絕俗隱不違親賢哉斯文生
人端格然恨甘旨不足每淪翮自咎及耿坐虛館凝神
定靈夜分假寐如聞琴聲發越宛在左右寤而驚惋貴
知音為難感鍾期善聽因賦是以廣意

寂兮琴之德寥兮琴之聲德徹陰陽之奧聲涵淳粹之
精體空洞響真清偉上皇之遺功起萬祀之垂名祇聞
成連伯牙以傳曲忽覩師文子春而移情俟良知轉化

靡忒鍾子期故有空山之谷清澗之湑幽人髣髴絕粒
茹芝憑高梧引長颺激楚窈窕流波逶迤陽阿布獲結
綠參差高秋風冷遠浦霜滋素月滿繁星稀雅調閑逸
流風遠吹鍾期當日傾耳志之怡性愜靈中矩應規躊
躇四顧侯其偉而曰聽商則知愁霖春零聞角乃覩韶
華秋榮羽發則寒生朱夏徵來則暑移玄英陵厲翕忽
消息竭盈君子悅懌導心和平斯實庖丁投刃而節應
郢人運斤而風生者也夫其高張絕絃韻清調苦愔愔

惻感一龍一虎猛將之逐虜冰雪操蘭蕙薰蕕今崇山
勁若寒雲烈士之諫君跂燕趙望江漢行路難杳無畔
淋漓涕渭牢落泮渙遊子之悽斷微未撫涕橫流悲宿
昔心悠悠樵童牧豎登孤丘哀引南音一何楚囚興歌
百里又喜子游應事態移體物聲愁或飛而不速或擁
而不留惜惜泠泠窮微達幽一偶鍾生之聽妙極而不
周於是夔襄愕眙昭曠咄咨音有至而乃發發當及乎
此時乃理雲和寫咸池感天地動神祇玄鶴鼓舞鳳凰

來儀風雷並雲雨隨黃帝之所聽瑩伊代人疇敢以窺
鍾子兀然收聽反視沉吟不已感樂之至精得音之微
旨信音之難蓋曲有此誠在聽之以心安可察之以耳
嗟嗟琴韻盡美矣

朱絲繩賦

唐闕名

達者觀物而自識眷繩而象直白能受采知成用而可
修樂匪在音遂執中而有得諒絲繩之為物類託質以
自植辛操張以一伸任縱橫而取則故能貞而守正勁

以全真舍至和以不屈抱孤直以誰鄰若剛克以自致
諒柔立而有音齊達人之履道比君子之修身久而莫
渝豈紅紫之見奪勁而不撓非糾纏之為倫當其澆水
初滋勢如束理女工爰作視其所以如疑積微於秒忽
遂立質於經紀察其本同成經以自綸喻乎時表直道
以如砥挂端標以有準持正色而為美將配德於清壺
願齊名於直矢故能從繩作直因物寓詞苟一繩之可
法將百行以為師義足仰而象矣理自中而得之直可

自侔奚感鮑君之與色非我行徒興墨子之悲將勁挺
而自守庶回邪而不欺俾夫取象師心必由斯道考朱
絲之外物得素尚於中抱奚水鑑之足徵拒韋絃之是
保觀夫正不與妍色儔勸吾人之聿修直不為虛聲枉
俾吾人之取象故能名昭樂曲義暢人謨鄙在禁而不
理賤為直以就汙願處微而自正終守直以不渝足以
詭良材而轉雅操端循質而喻通途苟中正之可進願
從繩而已乎

朱絲繩賦

唐 庾承宣

絲之為體兮柔以順德絲之為用兮施之則直從其音
而不改成其音而罔忒故君子體直以為象履中而立
身豈委曲而取媚將勁挺而維新既端懿以難匹想高
張而莫倫初未為絃兮信任其舒卷既比夫矢也諒難
乎屈伸寧懼不合於衆而改操不同其類而易真雖立
質以假物立音而因人敦夫恍氏之功辨夫園客之養
非繞指以可悅將如絲而是仰志士以是而興歎詩人

因此而取象清廟之瑟非我而莫聞空桑之琴非我而
奚響惟直是與惟端是求惡靡然以從俗恥紛若以隨
流天心保貞側媚見而用悔神道助正謬諤鑒而無憂
信乎去邪以受福孰不履正而身修間其色兮未嘉素
其質兮孰美信挺挺而直繩是若固奕奕而渥丹無比
欲衆之好我染之而匪他知代之惡邪直之而有以非
矯其俗將遷其時寧三思而有贊諒一向而無疑道在
斯而為得文舍此而何之古所以嗟是非而莫分怨邪

正之難考多將任情而媚俗鮮能率性而行道何不鑒
朱繩而獨異與羣類而且殊其美雖偶其道則孤儻斯
言而是當又可得而已乎

昭文不鼓琴賦

唐 吳 冕

息絃軫兮大樸玄同志琴音兮至人守中道不緣情則
去聲而外寂德惟抱素故含和而內融於是見高士之
心出常人之境其養貴默其伎尚靜及卷懷而克順反
不鼓而是逞蘊藝如何玄德靡他知迷則達用晦實多

虛張不彈俾指節而交暢全聲入妙臆心曲而同和且
人心靜為常琴心虛為主將寧體於道樞亦守器於德
宇壤之無故常寂響而有餘用之則虧乃含音而莫吐
故自適於胃臆亦何用於角羽顏子所以如愚昭文由
是不鼓近情好樂尚德養空罷奏南音悟人間之客寄
不操三峽體山下之泉蒙斯懷柔之古者竟生白於仙
宮夫動極則靜音繁不復守樸外真含虛內肅施絃罔
舉則見素而如絲沉聲莫發乃繁根而猶木因雅韻而

不奏識道情之所蓄此則恬然誰與寂爾自耽希夷既
造妙理難探栗里無絃淵明則矯王門碎質安道更慙
是以飾外者貴其體備厚內者尚其包含於戲琴心懸
解幽響何答於以閑和於以虛納十指攸措咸制動而
是宜五音知常各處寂而不雜故琴默而美昭信仁靜
而道合

戴安道碎琴賦

唐

黃滔

拔塵俗之能琴其誰不欽戴安道之擅名斯異武陵王

之慕義彌深降使殷勤將召來以聆雅越持誠慷慨爰
擊碎以示曾襟想夫名利莫羈煙霞為賞澗松雖聳於
梁棟野鶴不侵乎羅網吳山越水韜物外之清光蜀軫
虞絲播人間之妙響杳杳區區何人戒途白屋忽驚於
嘶馬朱門欲俟於啼鳥焉有平生探樂府錚鏦之妙爰
教一旦廁侯門戛擊之徒於是賁出月窓毀於蓬戶擲
數尺之鸞鳳珮一聲之風雨朱絃迸斷類冰泉裂石以
丁零玉柱交飄誤隴鴈驚弓而飛聚使者焉知宣言大

非且異鍛珠之義寧同碎斗之譏陌上迴塵走清風於
玉殿堂間釋手章素節於金徽於時野客相高時人或
陋梧雕桐斷以寧顧漆解膠離而莫救至若池亭夜月
之景巖谷春風之候遙當野岸肯思流水之曾彈靜對
庭蕪待從幽蘭之不奏向若投綠綺以無意緬維城而
有情亡一時之高躅矜六律於新聲則此日知音但仰
躍魚之弄碧山烟霧寧留藏豹之名則知藝至者不可
以簪笏拘情高者不可以王侯致終挺特以驚俗不斯

須而辱志於今人語其風孰不挹當時之事

魚琴賦

有序

宋梅堯臣

丁從事獲古寺破木魚斲為琴可愛玩潘叔治從而為賦余又和之將以道其事而寄其懷

為琴之美者莫若梧桐之孫枝夫其生也附崖石遠水涯陰凝其腋陽削其皮曾無漫戾而沉實之韻資噫始其遇匠氏也有幸不幸焉故未得盡厥宜其於不偶若陷於夷剝中刻鱗加尾及髻宛然而魚日擊而椎主彼

齊衆之律令則聲聞囂爾而四馳粵有好事者竭來睨
之取為雅器製擬庖犧徽以黃金絃以縷絲音和律調
乃升堂室嗚呼琴兮遇與不遇誠由於通室始時效材
雖甚辱兮於道無所失今而決可以參金石之奏焉無
忘在昔為魚之日

瑟賦

元
熊朋來

庖犧氏之創物兮始弦桐以為瑟象離三之虛中兮戴
九梁而洞越弦大衍之五十兮不勝悲而半析浩朱襄

之飄風兮肇五弦於士達替三之為十有五兮重華作
而增八灑有番弦兮或二十而贏七必五五而乃定兮
與天數以為一紛弦樂之殊名兮皆倣此而後出夫是
以稱樂器之尤兮莫敢擬大而度長歷炎黃而陶唐兮
為咸池之大章韶以詠而永言兮聲依永乎賡歌之明
良及周為雲和兮友之以龍門空桑想夫制作之妙伶
倫吹竽后夔拊手晏龍度左公輸斷右其長為黃鍾者
九兮倍其九以為首也其商為頌瑟兮其宮以為雅奏

也夫惟瑟聲者歌聲之所五弦二十有五兮旋宮具也
七絃相為律兮番弦五也鳳和鳴兮其句也鴈行飛兮
其柱也歌必取瑟兮既歌而語也徒歌曰謠兮徒鼓瑟
曰步也恒為堂上之樂兮瓠竹在下也名其為登歌之
器兮無故不去也瑟教廢則歌詩者莫之為譜也是以
聖門亟稱於瑟自秦以降豈無他弦而有所不必言焉
胡不觀於魯論乎孺悲之所聞點爾之侍坐由也之在
門弦歌之聲比瑟以傳又不觀於國風之唐秦乎唐有

山樞秦有車鄰皆專言乎鼓瑟不見刪於聖人胡不觀
文王之廟祀乎一倡三歎應弦如見歌呼於穆遺聲盈
耳升歌示德舍瑟曷以又不觀於周公之禮經乎飲射
賓燕禮盛樂備登歌在堂間歌在陛或以瑟二或以瑟
四堂上侑歌惟瑟而已若迺騶虞驪首間若疊奏鄉樂
惟意二南先後燕有房中五絃樂學有宵雅之肄教皆
三於瑟而他弦莫侑此古人之所甚重今人之所駭笑
者也自韓非之妄倫齊人之見擯秦蒙將軍剖之而為

箏易京君明變之而為準新聲代作古意浸泯若迺絲
聲之器遽數之莫能既侯氏之坎坎師延之靡靡嵇阮
寄嘯之具秦漢鼗鼓之戲於是六合百衲絲桐亦改其
制太乙天寶弦柱各出其新意吳蜀楚之聲不同平清
瑟之調滋異厥有鷗弦金縷左振右擊檀槽銀妝孤柱
四隔立搗卧摘竹軋木搯白虎之爪黃金之撥能使師
曠贖瓠巴拙但見吃阗蘇葩俳優裸裎以助其喧亟都
雲臘苔急笛悲策以奮其啁晰觀其指法則秦箏多撮

琵琶多攄瑩篌多擘柳琴多擊竊比於琴家之孫吟按
抑孰若一絃一柱取聲於自然而不假弄手以為力也
絃樂莫先於瑟他弦行世而瑟不行焉是棄其祖而為
支裔之從摧其根而葆由枿之萌也若迺道調仙呂託
異人之夢授而律呂每混於俗稱怨湘哭顏疑胡琴之
避徵而曲調例闕其徵聲又孰若一弦七律諸調皆在
焉而隔八之弦自相生也然而箏笛之耳未能聽古淡
者見操瑟而已嫉章句之儒僅知守詁訓者闖歌詩而

自失惟夫陸沉野逸舒湮宣鬱宛其俟命且以永日人
莫我好而吾瑟之僻於是采孤桐兮南山之陽致文梓
兮北山之北本以黃鍾度以周尺遂練朱而繩絲雖繪
錦而貴質小弦之縷七十餘二大弦之絲八十有七初
促柱以高張乍試手而拂歷始肆蒿革之食載歌寤寐
之服但聞誦詩之聲莫知弦指之力逮手熟而習貫益
心悅而志倦為之歌伐檀若有斲輪乎河干為之鼓考
槃若有叩槃乎山澗方且陳抑戒以自警聽衡門而無

悶賦白駒之逍遙諷淇澳之瑟僖和鐸鳴兮中清寄散
聲於咏歎共赤松而調均異湘靈之悲怨儻流魚之能
聽付狸鼠於不見誦閒情以自欣虞僕人之見訕遂乃
避俗塵而韜錦且弛弦以回鴈善吾瑟而不鼓思悠悠
兮待旦亂曰皇義肇瑟韶以詠兮姬孔歌詩瑟之盛兮
瑟遠詩存歌可傳兮孰能誦詩惟朱玄兮勿求諧世我
思古兮解弦弭柱羨昭文不鼓兮

清廟瑟賦

宋陳普

文穆穆兮其神在天廟以安之兮於穆其淵王在新邑
兮但攝政之七年八鸞鏘其來會兮亦以祀焉鬱合鬯
兮蕭合薌羶相肅雖兮不懈益虔士濟濟兮駿奔走執
豆籩簫未舉兮鐘磬在懸有瞽有瞽升援瑟兮疏越朱
絃坐之西階之上兮使之奏清廟之篇歌者之一唱旃
三歎旃絲聲獨以遲兮人聲渺緜淡乎若太羹兮酒之
玄衆耳所入兮神之聽也專洋洋其上兮見者愀然後
有虞兮歲兮且千遺音此作孚兮尚搏詠之有傳微夫

子其孰知兮以之冠三頌之顛自浴沂之一鼓兮寂寥
塵編人心日以靡兮鄭衛噪蟬中夜以思兮涕淚漣漣
誰為我瑟此頌兮寫予中之悁悁

清廟瑟賦

元 馮 勉

猗歟瑟之良材兮鍾天地之蕤英紛柯條之暢茂兮沐
風露之清泠立基下謀之既遠兮又咸英韶濩其弗逮
諒后夔之不遺兮顧工倬其安在際有周之盛德兮郁
清廟之載歌將需材以製瑟兮宣烈文之至和若有人

其采采兮雲飄飄而來下羌翦伐以待用兮豈曰偁夫
矩度邁公輸之準繩兮超郢人之巧妙伉離婁以察微
兮駢師曠而審調偉姬旦之制作兮仰穆穆而敬止俾
聲洪以且舒兮懷徽音其不已歲祀事之孔嚴兮殫後
王之肅雖若陟降於彼蒼兮聲朱陽其渾融肇黃鍾以
為宮兮迭商角而羽徵二變音之既加兮互周旋其條
理上君而下臣民兮暨事物而有徵表前緒之耿光兮
昭白日之精誠聆幽幽而飛揚兮若鳳凰之鳴岐又正

直而不流兮若詠羔羊而素絲紛陽律既諧於陰呂兮
若睢鳩之在渙又小大之統如今兮若信厚之麟趾宜秉
德之無數兮儼多士之濟濟也一倡而三歎以從兮信
遺音之至美也想其鏘鐘兮鏗鏘洛磬兮琳琅羣音兮
翕張總大成而有章大樂作兮萬邦諧天關決兮地根
開百祥兮畢集四靈兮斯來蓋瑟列於堂上之樂其功
則浩浩而無涯也客或誥之曰子不聞鼓瑟而合於軒
轅之律呂者彼豈不歌於周文乃徒立於齊門邪子應

之曰瑟之舍兮浴沂風兮瑟之用兮歌聖神之功兮瑟
兮瑟兮與天地相為流通兮容唯而退

清廟瑟賦

元
張師曾

繫庖犧之造瑟兮妙制度之玄功雖窈冥之高遠兮亦
相與而潛通暨軒轅之有作兮貴簡易而適中與虞舜
之以詠兮感祖考而來從誠後聖之嘉尚兮用崇祀而
攸同懿文王之至德兮固純亦而不已有盱眙之在天
兮建清廟而萃止既籩豆之靜嘉兮復牲齊之濟濟欲

感通而有孚兮舍音樂而孰以矧清瑟之最古兮又雅
淡而相宜頌盛德而形容兮告神明而在茲伊太師之
所莅兮列中樂而陳之惟茲瑟之所制兮長七尺而有
竒又尺八以為廣兮抗高古以自竒既懿美而合度兮
匪聖人其孰為何朱弦之既疏兮又流越而聲遲斯焉
所以為異兮故淡泊而音希差登歌而在上兮與人聲
而相依乃一倡而三歎兮致清廟之至遺靈皇皇而假
兮若穆穆其容儀諒不顯而亦臨兮詎有射於人斯偉

後裔之精誠兮承辟公而奉祭駿奔走而靡遑兮供宗
廟之有事或肅雝之顯相兮秉文德而一致罄精白於
此心兮聞清瑟而愈勵宜靈貺之叢臻兮故福及其後
昆既制禮而作樂兮遂偃武而修文深仁浹於四表兮
美化囿於元元延皇家之丕基兮永八百之歷年實先
王之降監兮保終始而弗諼有為瑟於孔氏兮故聖心
之莫予庶俾之以自警兮合中道於規矩彼操瑟於齊
門兮志欲謀於進取奈如意之不同兮亦何慙於齟齬

曾瓠巴之弗若兮一鼓瑟而魚舞嘉清廟之所用兮有
瞽矇之傳授逢聖元之盛德兮播大音於清美洗鄭衛
之咬哇兮還太古之空浮備六代之樂舞兮奉蒸嘗於
聖神永千秋與萬歲兮陶和氣於黎民

箏賦

漢侯瑾

於是急絃促柱變調改曲卑殺纖妙微聲繁縟散清商
而流轉兮若將絕而復續紛曠蕩以繁奏邈遺世而越
俗若乃察其風采練其聲音美武蕩平樂而不淫雖懷

思而不怨似幽風之餘音於是雅曲既闕鄭衛仍修新
聲順變妙弄優遊微風飄喬冷氣輕浮感悲音而增歎
愴頻悴而懷愁若乃上感天地下動鬼神享祖祖宗酬
酢嘉賓移風易俗溷同人倫莫有尚於箏者矣

箏賦

魏
阮
瑤

惟夫箏之奇妙極五音之幽微苞羣聲以作主冠衆樂
而為師稟清和於律呂籠絲木以成資身長六尺應律
數也故能清者感天濁者合地五聲並用動靜簡易大

興小附重發輕隨折而復扶循覆逆開浮沉抑揚升降
綺靡殊聲妙巧不識其為平調定均不疾不徐遲速合
度君子之行也慷慨磊落卓礫盤紆壯士之節也曲高
和寡妙伎雖工伯牙能琴於茲為朦朧繹翕純庶配其
蹤延年新聲豈此能同陳惠李文曷能是逢

箏賦

晉 賈 彬

溫顏既緩和志向悅賓主交歡鼓鐸品列鍾子授箏伯
牙擊節唱葛天之高韻讚幽蘭與白雪其始奏也寒澄

疏雅若將暢而未越其漸成也抑按鏗鏘猶沉鬱之舒
徹何以盡美請徵其喻剖狀同形兩象著也設絃十二
太簇數也列柱參差招搖布也分位允諧六龍御也

箏賦

晉陳

氏

陶融妻

伊夫箏之為體惟高亮而殊特應六律之修和與七始
乎消息括八音之精要超衆器之表式后夔創制子野
考成列柱成陣既和且平牙氏攘袂而奮手鍾期傾耳
以靜聽奏清角之要妙詠騶虞與鹿鳴獸連軒而率舞

鳳踉蹌而集庭汎濫浮沉逸響發揮翕然若絕皦如復
迴爾乃秘辭豔曲卓礫殊異周旋去留千變萬態

箏賦

梁簡文帝

江南之竹弄玉有鳴鳳之簫焉洞陰之石范女有遊仙
之磬焉若夫排雲入漢之美含商觸徵之奇罷雍祠之
麗響絕漢殿之容儀別有泗濱之梓聳榦孤峙負陰拂
日停雪棲霜嵌崿崿玄嶺相望寄丹崖而茂采依青
壁而懷芳奔電礪突而彌固嚴風擗拔而無傷遂畏峰

濕人羣罕至乃命夔班翦而成器隆殺得宜修短合思
矩制端平雕鏤綺媚既而春桑已舒暄風曖暖丹萸成
葉翠陰如黛佳人採掇動容生態值使君而有辭逢秋
胡而不對里閭既返伏食蠶飢五色之繆雖亂八熟之
緒方治異東垂之野繭非山經之漚絲於是制絃擬月
設柱方時若夫鏗鏘奏曲溫潤初鳴或徘徊而蘊藉或
慷慨而逢迎若將連而類絕乍欲緩而頻驚陸離抑按
磊落縱橫奇調間發美態孤生若將往而自返似欲息

而復征聲習習而流韻時怳怳而不竝如浮波之遠驚
若麗樹之爭榮譬雲龍之無蒂如笙鳳之有情學離鷗
之弄響擬翔鷺之妙聲朱絃在手擊重還輕爾其曲也
雅俗兼施諧雲門與四變雜六列與咸池王讚既工阮
賦亦奇曹后聽之而歡譙謝相聞之而涕垂至若登山
望別之心臨流送歸之目隴葉夜黃闕雲曉伏覩獨鴈
之寒飛望交河之水縮聽鳴箏之弄響聞茲絃之一彈
足使遊客戀國壯士衝冠若夫楚王怡蕩楊生娛志小

國寡民督郵無事乃有燕餘麗妾方桃譬李本住南城
經移東里納千金之重聘擅專房之宴私方美珥而不
減擬甘橘而無嗤聞削成於斜領照玉綴於鉛脂度玲
瓏之曲閣出翡翠之香帷腕凝紗薄珮重行遲爾乃促
筵命妓銜觴置酒耳熱眼花之娛千金萬年之壽白日
蹉跎時淹樂久翫飛花之度窻看春風之入柳命麗人
於玉席陳寶器於紉羅撫鳴箏而動曲譬輕薄之經過
黛睂如埽曼睂成波情長響怨意滿聲多奏相思而不

見吟夜月而怨歌笑素彈之未工疑秦宮之詎和若夫
釣竿復發蛺蝶初揮動玉匣之餘怨鳴陽烏之始飛逐
東趨於鄭女和西舞於荆妃足使長廊之瓦虛墜梁上
之塵染衣鱗魚遊而不沒白鶴至而忘歸於是乎餘音
未盡新弄縈纏參差容與顧慕流連落橫釵於袖下斂
垂衫於膝前乍含猜而移柱或斜倚而續絃照瓊環而
俯捻度玉瓜而徐牽見微頰之有趣看巧笑之多妍抗
長吟之靡曼雜新歌之可憐歌曰年年花色好足侍愛

君傍影入著衣鏡裙含辟惡香鴛鴦七十二亂舞未成
行故迺宋偉綠珠之好聲文君慎女之清角工掩面而
不前言韜輝而恥學實獨立之麗人乃入神之佳樂

篋篋賦

晉曹毗

嶧陽之桐植穎巖標清泉潤根女蘿被條爾乃楚班制
器窮妙極巧龍身鳳形連翩窈窕纓以金彩絡以翠藻
其絃則烏號之絲用應所任體勁質朗虛置自吟於是
召倡人命妙姿御新肴酌金罍發愁吟引吳妃湖上颭

皆以平雅前溪藏摧而懷歸

筓篴賦

晉孫氏

鈕滔母

考茲器之所起實侯氏之所營遠不假於琴瑟顧無取
乎竽笙爾乃陟九峻之層巖晞承溫之朝日剖嶧陽之
孤桐伐楚宮之椅漆徵班輸以造器命伶倫而調律浮
音穆以遐暢沉響幽而若絕樂操則寒條早榮哀曼則
晨華朝滅邈漸離之清角越子野之白雪思超梁甫願
登華岳路險悲秦道難怨蜀遺逸悼行邁之離秋風哀

年時之速陵危柱以頡頏憑哀絃以躑躅於是數轉難
測聲變無方或拂搦以颺沉或頓挫以抑揚或散角以
放羽或攄徵以騁商

箜篌賦

以奇弄已
闕為韻

唐
闕名

山有梧兮猗猗乍雲鬱而風披豈雅琴之獨得諒箜篌
之可為操斧者取則不遠度木者形之又奇篌以姓而
得箏以坎為知考宮商於制氏窮巧妙於般倬虛受其
心北牖之清風合韻曲全其勢南樓之華月半虧雕鏤

雜錯絲組懸垂倚銀屏而燭爛拂綺裊而彰施矧陽陰
之應節蓋風俗之能移況乎度曲無方安位必中呼韓
美其寵錫師曠加其撫弄調而合雅聲則殊衆鄙羌笛
之吟龍輕秦樓之吹鳳既而越豔秦城南鄰北里玉戶
卷兮真珠箔清揚婉兮瓠犀齒青樓何處倚城向日九
烏雛綺帳初開綵綬銜花雙鳳子斤璫瑟而不御彈箏
篴以為美絙朱絃揮玉指邀鄭舞以徐進雜吳娃而競
起靡靡乎蕩心洋洋乎盈耳窮斯樂只我有酒兮嘯也

歌歎彼狂且公莫度兮宛其死苟哀樂之能變可謂感
人情之不已且禮則常履樂焉可闕禮處身而不至樂
因心而乃發惟弘雅焉鏗鏘守之不變豈桑間與濮上
而能亂越恨牙琴之不知奚由瑟之自伐

琵琶賦 有序

晉傳 玄

世本不載作者聞之故老云漢遣烏孫公主嫁昆彌念
其行道思慕使工人知音者載琴箏筑篴篥之屬作馬
上之樂觀其器中虛外實天地象也盤圓柄直陰陽序

也柱有十二配律呂也四絃法四時也以方語目之故
云琵琶取易傳於外國也杜摯以為嬴秦之末蓋苦長
城之役百姓弦鼓而鼓之二者各有所據以意斷之烏
孫近焉

素手紛其若飄兮逸響薄於高梁弱腕忽以競騁兮象
驚電之絕光飛纖指以促柱兮創發越以哀傷時旃搦
以劫蹇兮聲皦耀以激揚啓飛龍之秘引逞奇妙於清
商哀聲內結沉氣外澈舒誕沉浮徊翔曲折

琵琶賦

晉孫該

惟嘉桐之奇生於丹澤之北垠下修條而迴迴上糾紛
而干雲開黃鍾以挺榦表素質於蒼春然後託乎公班
妙意橫施四分六合廣袤應規迴風臨樂刻飾流離絃
則岱谷縈絲篚貢天府伯奇執軛杞妻抽緒大不過宮
細不過羽清朗緊勁絕而不茹伶人鼓馬景響豐礪操
暢絡繹遊手風颭抑揚按捺拊搯摧藏爾乃叩少宮騁
明光發下柱展上腔儀蔡氏之繁絃倣莊公之倍簧於

是酒酣日晚故為秦聲壯諒慷慨土風所生延年度曲
六彈俱成絀邪存正疏密有程離而不散滿而不盈沉
而不重浮而不輕縣駒遺謳岱宗梁甫淮南廣陵郢都
激楚每至曲終歌闋亂以衆契上下奔騖鹿奮猛厲波
騰雨注飈飛電逝

琵琶賦

晉成公綏

八音之用誦於典藝蕭韶九奏物有容制惟此琵琶興
自末世爾乃託巧班輸妙意橫施因形造美洪殺得宜

柄如翠蚪之仰首盤似靈龜之背觚臨樂則齊州之丹
木拊柱則梁山之象犀挽以玳瑁格以瑤枝若夫盤圖
合靈太極形也三才判合兩儀生也分柱列位歲數成
也回憲華表日月星也

琵琶賦

唐虞世南

若夫巢木為金門之始轉蓬乃玉輅之先斯蓋前古之
樸畧而後代之精研是以鼉鼓質而罕聽葦籥輕而莫
傳笛不為於商律瑟見毀於繁絃此皆白圭玷以成疾

嗟近者之莫言歎知音之不述惟皇御極書軌大同鑠
矣文教康哉武功既象舞之載設亦夷歌之遠通乃定
八音論六樂成均弦誦之藝制氏鏗鏘之學辨新聲於
變徵研奇操於清角鏞管咸奏絲桐畢陳有琵琶之妙
曲乃越衆而超倫器便時而適用節每段而逾新謚四
座以傾耳歎和聲之入神爰詔百辟備序厥因於是大
司樂進而稱曰臣以末學聞諸前志尋斯樂之所始乃
絃鼓之遺事強秦創其濫觴盛漢盡其深致爰有達人

演茲奇器參古今而定質擬神明而攄思慰遠嫁之羈
情寬絕域之歸志既而班爾運能鈞繩將設求嘉木於
五嶺取殊材於九折剖文梓而縱分割香檀而橫裂木
瓜貞柘盤根錯節或錦散而花開或絲縈而緒結徒觀
其為狀也則象形斗極殊姿巧製隨良樸之修短任規
模之巨細既異才而合體亦刻方而為銳惟適道以從
宜故無取乎凝滯若乃琢玉範金之巧雕文鏤采之奇
上覆手以懸映下承絃而仰施帖則西域神獸南山瑞

枝屈盤犀嶺迴旋鳳池開寶撥以更運帶文緩而旁垂
聲備商角韻包宮羽橫却月於天漢寫迴風於洛浦始
聞絃之既調乃長弄之徐撫應緩韻之疎節隨輕身之
妙舞悲紫塞之昭君泣烏孫之公主季倫歡金谷之宴
仲容暢竹林之聚至如七德昭備六軍凱旋諧戎麾而
威遠合金奏而功宣詠燕山之已勒美瀚海之方鐫亦
有飛梁邸遊楚館聞促柱之再調聽鳴絃之疎彈叶高
文而自達飛羽觴之無算又如長河草綠高樓月下入

小苑而看花遊上蘭而藉野泛澄波而轉鷁息長松而
繫馬臨清流而揮弦與殊方而俱寫其奇趨則抑揚嘈
囀聯絲斷續紆餘雙鶴之吟清壯三秦之曲望南山之
遥翠見西江之始綠少年有長命之詞倡女有可憐之
調顧百齡兮睂壽重千金之巧笑逮乎嘉客既醉高宴
將闌浮觴劇飲披襟極歡乃催絃而急調交酬獻之無
端若以河而注海亦枉來而始彈蓋感物動神和心悅
耳豈振木之為輩奚繞梁之足擬夫道以簡易為尊物

以精微為貴嗟四絃之已約乃包含於元氣叶笙鏞之律呂參鍾石之經緯於是鳳簫輟吹龍笛韜吟玄雲掩影白雪藏音故以暢皇風之威武悅大雅之神心者也

琵琶賦

唐薛收

惟茲器之為宗總羣樂而居妙應清角之高節發號鍾之雅調處躁靜之中權執疎密之機要遏浮雲而散彩揚白日以垂輝爾其狀也龜腹鳳頸熊據龍旋戴曲履直破觚成圓虛心內受勁質外宣磅礴象地穹崇法天

候八風而運軸感四氣而鳴絃金華徘徊而月照玉柱
的歷以星懸

聽彈琵琶賦

明
袁尊尼

原夫琵琶之為技也按調流音徵曲寫聲下上其手逆
順有經絃無取多宮填徵鏗洪殺會節要眇希清振容
動思暢志懌情遠傳胡漢近稽漢京信樂府之妙品絲
屬之雅鳴非夫嬌唱嘹瀏明姿盛麗皓齒素腕玉瑩肪
膩照耀激盪耳駭目注則不足以稱擅工而繩絕倫諧

羣心而娛極意蓋絲馮肉亮器以神宣色藝雙珍古今
共拊客有與於茲賞者乃賦之曰夫何有美之沃若兮
洵媚嫵而修姱披苾房以稟秀兮絢芙蕖而濯華擅絕
代於名都兮掩衆姝於天斜曰予幼好此薄藝兮醜俗
工委巷之煩哇謂上客儼其安坐兮奄日暮無以為樂
也援四絃而試一鼓兮久矣予斯音之不託也爾其擅
祛出手婉約善容微偃却坐調絃淙淙態逸情朗矯若
凌空乍撥良已欲放未雄鳳延頸以倚臉龍蟠體以當

宵鷗筋迸縮而高張檀槽攏撚而聲融華表應虛以送
響回窻櫺竅以含風啓丹脣兮揚修蛾倡回波兮間積
雪絃之疾兮脫兔馳歌倚之兮貫珠協幽留屢抑澀春
鶯也爽切赴會折寒冰也正宮鏜喤鳳和鳴也悠延細
轉竹溜清也倏歛激突戰騎驚也砉然止劃掣裂繒也
曲終有聞餘韻凝也四坐靜聽蹶不覺其醉之醒也飛
聲復酬跋燭更秉俟俟于于忘夕之永始奏兮恍皆有
觸畢彈兮各獲所領閨辭多思歡聆乃欣越調沿怨樂

感俱泯匪烏孫之出塞異馬上之悽聞豈潯陽之去國
殊舟中之愴神固知境善遷物而音能會心也載歌曰
雲披日遲藹春陽兮餘寒夕清夜未央兮并榦綺疏靚
蘭房兮布席高譙燭煌煌兮蕙肴雜遝臭芬芳兮有客
既醉醉徜徉兮於鑠令姿耀宵光兮朱絃親御歌琅琅
兮其歌伊何鳳求凰兮願言矢心結明璫兮彼美人兮
德音可忘兮

御定歷代賦彙卷九十四